

憨山老人夢遊集

憨山老人夢遊集卷三十二

侍者福善日錄

門人通炯編輯

嶺南弟子劉起相重較

化生儀軌

語曰聖人不出世萬古如長夜故我

本師釋迦文佛示現王宮出家雪山六年苦行悟道成佛於鹿苑說法度生當佛未出世時閻天外道有九十六種各立門庭皆稱師長及佛成道說法之時諸外道一一歸依出家爲佛弟子依教修行證阿羅漢果故今靈山一會一千二百五十餘人皆是外道之儔也當是時也有信佛者則皈依佛法依教奉行

其不信者則生驚疑乃至種種魔害毀謗墮惡道者不可勝數是知今之佛法未行之地皆似佛未出世之時智愚賢不肖雖有疑信之不一是皆不知我佛出世之本懷及度生漸次方便之軌則也故今略述化生方便之次第使未聞未信佛法者知我等爲僧化生之沘門非是一事一行一門而可入也故曰方便有多門歸源性無二要之四十九季皆隨機大小淺深之序所謂教不躐等也卒宜委悉勿謂常談一佛以一大事因緣出現世間所謂開示衆生佛之知見使其悟入惟此一事更無餘事所云一大事者

謂要衆生知生死爲一大事也。佛知見者，乃衆生各各本有之佛性也。由迷此佛性而成生死。今要出生死苦，必以悟佛知見爲第一義。如此豈非佛爲直指人心，見性成佛，而出世間，是則禪道悟心一路，不待達磨闢來，狀佛特爲此事而出世也。爭奈衆生歷劫以來，貪瞋癡愛，煩惱惡見，迷之已深，不堪頓示悟心之大法。故將一乘法分別說三，以此故有三乘漸次之設。所謂小乘中乘大乘也。至有不堪小乘之泐者，則設五戒十善爲人天善果，且免墮三涂地獄餓鬼畜生之苦。故曰五戒不持，人天路絕。今爲佛弟子，遵

奉

佛教以度生爲事業若不漸次方便誘引入道一旦示之以大汰則反使橫生疑謗自取三涂之苦是以醍醐爲毒藥矣乃不善導之過也故今遵

佛所制在家善男子名優婆塞善女人名優婆夷當持五戒以修人天善果在家五戒者

一不殺生

此戒感將來長壽及如意眷屬和合現任子孫昌盛之報

二不偷盜

凡不與而取皆名爲盜此戒感來世得大富饒衣食豐足所求如意之報

三不邪淫

非已妻妾妄生淫欲名爲邪淫此戒感來世得妻妾貞良父慈子孝眷屬六親

和合之報

四不妄語

凡言不實闢構兩家名爲妄語此戒感來世智慧過人言語真實聞者皆信依教而行

五不飲酒

酒能昏迷亂性發任生禍爲衆惡之本此戒感未來智慧明達識見超越之報

右上五戒乃我

佛出世初爲世間在家之人特設此教令人依戒修因則不負此生免墮惡道能感來世不失人身得長壽大富子孫家道豐盛文明特達之報凡今高官尊爵富厚豐盈聰明利達之人皆從修持五戒中來狀此五戒卽儒門五常不殺仁也不盜義也不邪淫禮也不飲酒智也不妄語信也故佛洵有裨

王道者以五戒化人則無詞訟省刑罰家治而風淳矣此吾

佛最先所設化生之儀也今世俗之人不知

佛法全無好善之心而返生謗佛謗法謗僧之見是自甘愚迷自取苦趣耳又有一等之人雖能喫蔬而不知

佛法正修行路聽從無爲外道邪人不敬

佛祖天地不孝父母不燒香禮拜三寶專一味邪行邪說盲盲相引相聚妄談以爲傳法全不知有正修行路而返謗佛法僧堅執不化此乃最愚癡人是可以

憐者卽今奉

詔旨所當禁者是也唯願當世高明君子辯白邪正是非凡遇此輩卽當開示令其捨邪歸正不但護佛法是亦有助於

王化也朕學邪學正總是一念善心可惜不知是邪而誤墮今若知非又何不捨彼邪徒而爲真正善人爲

聖世之良民乎

右五戒乃佛教修人道之因果又設十善業道爲人天之因果所言十善者

一身三惡業謂殺盜淫若斷此三惡則名三善道
二口四惡業謂妄言綺語兩舌惡口若斷此四名
四善道

三意三惡業謂貪瞋癡若斷此三名三善道

如上十惡乃常人日用而不知者今若能斷此十惡
則名十善爲生天之因是爲純善之人此十善亦卽
儒門正心誠意修身之道也若果能修此則現世爲
聖爲賢則定感來世生在天宮受勝妙樂此萬萬真
實之行世人何故愚迷不知而專向邪道爲得豈不
辜負此心哉

如上五戒十善乃吾

佛特爲世間在家之人所設之教要人依此修因不失人天之福此金口所宣不妄之談若不遵此修總是邪道非正行也總有苦心修行都無利益反增苦累是謂以苦捨苦吾

佛已深痛之矣今世間五部六冊之說乃外道邪人妄稱師長偷竊佛祖言句雜集世俗鄙俚之言以惑愚民所謂邪道亂真者卽今

聖旨所禁皆此輩也在家之人既有好善之心何不歸依

三寶而必墮此邪法豈智人哉

又觀今世好善男子已能歸依

三寶以自恃世智聰明伶俐之見便生下劣魔心薄
五戒十善而不爲以好禪爲上乘三業不修乃以祖
師現成公案看了幾則記在胸中便逞利口動使機
鋒當自己妙悟以此爲是全不知非又且誹謗大乘
經典爲文字不足取又笑真修實行之僧爲小乘妄
起種種邪見全不信有因果罪福甚至慢佛慢法慢
僧殊不知自墮愚迷業障坑中妻子聚首衆苦熱惱
交煎且妄指目却是道如此愚癡之人是爲大可憐

憫者既有一念向上之心何不真真實實做些着落工夫所謂說得十分不若行得一分如此妄談譬如貧人妄稱帝王自取誅戮可不哀哉奉勸世之善士聰明利根有志出生死者當自量根器叅禪固是向上一着以此乃佛祖專爲上上根人說在諸人試自點檢果是上上根人否果能一一頓悟否果能當下便了百劫生死否如其根非上上卽宜量自己力專心修淨土門回向勸方願生極樂永捨娑婆之苦此一法門從古修因僧俗依之出生死者不可勝數所謂萬修萬人去最是穩穩當當一毫不錯之大法門

也祖師云唯有徑路修行但念阿彌陀佛以此泐門全不誤人若能放下身心依此修行所有應行規則略示於後

一淨土一門往往士大夫談說專爲中下根設殊不知此門三根普攝無機不收最爲廣大且又簡而易行卽古之祖師悟道之後回心向淨土者不少如永明中峰諸大祖師非一人也但修行念佛有上中下三根不同故淨土九品亦因根有別也

狀淨土有三種者一常寂光土二實報莊嚴土三方便有餘土此卽凡聖同居土且此三土修因不同故

所感各別試略言之

一常寂光土卽圓覺經所云大光明藏此中聖凡平等依正不分唯佛法身湛然常寂乃諸佛所證法身境界此唯從上諸祖一念頓悟法身妙契同體入佛境界者所居此正上上根人之淨土豈可輕視爲中下人設也

三實報莊嚴土此卽二十重華藏世界乃我

盧舍那佛曠劫修行感稱法界量無盡莊嚴之妙土卽華嚴經所說重重無盡世界莊嚴者此乃報身佛所居單爲十地菩薩轉大法輪之淨土卽二乘聲聞

不見不聞此卽法華會上諸授記之人待多劫修因將來所感此中一分之淨土此殊非尋常易易可到也

三方便有餘土亦名凡聖同居土此正九品分別乃阿彌陀佛之化土也以華藏世界有二十重從第一重有一佛剎微塵數世界圍繞下小上大如倒浮屠從此已上倍倍加增至第十三重狀此娑婆世界乃十三重之中心主剎其極樂土與娑婆正等從中至鹵等葉邊際故云過十萬億佛土之外與娑婆並列者以十方佛土獨有娑婆爲穢惡土石諸山雜穢充

滿三涂八難衆苦所聚名爲堪忍衆生剛強暴惡前
化故我

釋迦文佛縱以十善化導人天亦在生死之中未出
輪迴若叅禪悟心又難頓悟故設念佛求生淨土一
門名橫超三界以仗

阿彌陀佛因中願力云十方世界衆生有能念我名
號不生我國者誓不成佛以仗此願力凡念佛者彌
陀定來接引生彼淨土故易生耳狀此淨土開有九
品者若叅禪悟心未能忘心境者則生上上品有念
佛一心不亂者則生上中品有叅禪未悟持名精純

萬行莊嚴則生上下品若修萬行持大乘經專持名號志願往生則生中三品有精持五戒十善專心念佛發願回向不論僧俗多生下三品此雖未斷煩惱以但得生彼國見佛聞法居不退地永不落三界生死從此發願再來三界度生則來去自在不被生死苦惱羈留所以永明禪師說但得見彌陀何愁不開悟是也此一法門一生精誠可辦一得生彼頓脫生死永出輪迴如此直捷法門又何患而不修且薄之耶狀叅禪了生死難念佛了生死易只要當人一念真實肯切苦心耳從古生淨土者無量無數皆世人

眼見而不信、又有何法可信耶、今奉勸高明智士、當信自心、不可謬信邪說也、卽在法門中、有禪淨兼修之士甚多、如永明所說念佛參禪、參禪念佛、所謂有禪有淨、土猶如帶角虎、現世爲人師、將來作佛祖、此亦最上之行也、與夫妄稱悟道、墮大妄語者、天淵也、惟夫一切衆生、自迷本有之佛性、墮落三界生死輪迴六趣苦難之中、長幼沈淪、不得出離者、皆因貪瞋癡愛、以資淫殺盜妄諸惡之業、捨身受身、皆以淫欲而正性命、生生世世、父母妻子六親眷屬、恩愛牽纏、三界大火所燒、無有一人能免之者、故我

本師釋迦文佛於常寂光土興起大悲救苦之心捨
自性法樂從兜率降皇宮入母胎捨父母妻子割斷
世間深重恩愛頓棄金輪王位走入雪山剃除須髮
六年凍餓苦行修持乃至悟道成佛此乃是第一箇
爲生死出家之樣子也及成佛後又遭魔害受金鎗
馬變之難種種堪忍拌捨身命受盡無量魔怨之難
說法四十九年只是一念慈悲爲度衆生救令出苦
而已惟此一事更無餘事故靈山會上弟子一千二
百五十人皆一時英靈豪傑之士學佛所行各各捨
離世間父母妻子恩愛依佛修行了悟恩愛得出生

死證阿羅漢果如阿難爲佛之弟亦隨出家隨衆受
苦此乃吾

佛所度弟子出家之榜樣也佛在世時投佛出家之
弟子不知修行之法故佛因事設戒令其止惡防非
得正襲修故初出家者名爲沙彌則設有十戒及至
比丘則設有二百五十戒女人出家名比丘尼則設
有五百大戒乃至國王大臣宰官居士與在家出家
四衆人等進修菩薩大戒則有梵網經說十重四十
八輕戒此諸戒律乃吾

佛法門之家法也故云若人受佛戒卽入諸佛位若

爲僧不受戒者名爲禿賊盜佛袈裟裨販如來非佛弟子此爲僧奉法之不易也然佛在世時人壽百歲佛當壽百季以念末法弟子無福止住世八十季留二十季未盡之福與後世兒孫故今之弟子供養四事皆受用吾佛白毫光中一分功德卽施主粒米莖菜分毫之施利皆佛所留之福田今入在法門爲僧者竟不知佛是何人亦不知已爲何事不知爲何捨父母棄妻子剃除須髮不在俗家而住寺中亦不知不耕不織衣食從何而來只道是自己有能化得施主供養更不知施主信心膏血難消將來拖犁

拽耙銜鐵負鞍，躪償之苦，此其大家一齊迷悶而不知者。若是如此受用，有能麤守戒行，持經念佛，守本分者，猶自可也。況又全不知僧體，不守戒行，縱放身心，攀緣俗親，出入不忌，不避譏嫌，乃至違犯禁，全不知非者，又非一種矣。竟不知爲何出家，爲何捨俗，爲何剃除鬚髮也。不但不知修行之事，卽燒香禮佛，散奉三寶之心，絕狀忘之，混混一生，醉生夢死，全不知有出家正修行路。卽有見者，返以爲非，此爲最可憐愍者矣。佛言：三涂地獄未是苦，向袈裟下失却人，身始爲苦也。總之不知僧爲何物耳。故四十二章經

云

佛言汝等比丘每於晨朝當自摩頭若自摩頭則
返省自己爲甚無須髮也以不知佛法出家規矩故
師不成師而弟子亦不成爲弟子上下絕分鳥獸同
羣但知衣食爲急全不知有生死之事不怕將來有
三涂之苦世間以此習俗成風以爲常事至有離鄉
行脚操方者亦止知有叢林粥飯茫不知有佛法禪
道此又大可憐愍者矣嗟乎太聖時遙法門頽弊一
至於此不可救也雖然十室之邑必有忠信惟今在
在諸山豈無英靈豪傑之士哉每於一方但有一二

有發心興起者。自狀有轉化之機矣。故今惟望住刹
有志之士。各宜恩省回頭。當念生死大事。痛改前非。
發起一念向道之心。發心之初。先要參請善知識。秉
受沙彌十戒。若持十戒無犯。則進比丘二百五十戒。
一一戒條。委細檢點。乃至進受梵網菩薩大戒。以
佛設教。以戒定慧三學爲成佛之本。所謂因戒生定。
因定生慧。是爲三無漏學。其諸戒相。具載戒經。請自
檢閱。不必細列。既能受戒之後。不論獨居隨衆。定要
半月半月。對佛誦念戒品。有毀犯者。對衆懺悔。改過
自新。則身心清淨。業障消除。乃爲出苦之要也。既能

持戒爲修行之本則當親近佛法縱不能出門他方聽講亦當自己發心專一持誦大乘經典或學嚴法學圓覺楞嚴諸大乘經以種般若因緣或有志專修西方淨土一門則以念佛爲正行誦大乘經爲助行六時發願回向求出生死苦趣如此方不負出家之莫大因緣亦不虛度此生矣若有上上根人發心脫離俗業操方叅請知識志究已躬下生死大事者只須單提一念更不外求此又最上一乘之根器狀但發信心定有發明了悟之時是在各人根器志向何如耳如上所說持戒修行誦經念佛雖不能頓悟自

心亦不空過時分亦不負出家之緣耳若夫悠悠縱情至死無成可不大哀也哉空過今生墮落三涂則將來又不知何時出頭也

如上所說在家出家修行之法雖淺深不同乃我佛出世初二十季所說之法也狀佛說法四十九季所說之法有三乘謂小中大初二十季但說有教名爲小乘謂有三界生死之苦可出有二乘涅槃可求有善道人天因果有惡業三涂之因果一切諸法皆是實有故云四諦之法諦者實也四諦者乃苦集滅道四法也謂實實有苦可受集者貪瞋癡愛煩惱也

言此煩惱爲諸苦之因能招苦果故謂實實有煩惱之集可斷也滅者出三界外二乘偏空涅槃以出生死證此涅槃樂故謂實實有涅槃可證也道者乃修行之方法乃二乘人所修厭苦斷集慕滅修道謂八背捨五停心觀謂觀身不淨觀受是苦觀心無常觀泐無我又有一總相念別相念等觀此名小根所修出苦之泐也名小乘教又有一等根器少利者名爲中乘卽廣前四諦說十二因緣之泐謂無明緣行行緣識識緣名色名色緣六入六入緣觸觸緣受受緣愛愛緣取取緣有有緣生生緣老死憂悲苦惱是名十

二有支此十二支該三世因果謂過去二支因乃無
明行現在五支果乃識至受現在三支因謂愛取有
未來二支果謂生老死憂悲苦惱緣者引也謂三世
輪迴因果相緣引而有也以中根人觀此十二因緣
有流轉還滅二門謂從無明至老死等爲流轉門若
無明滅則十二有支齊滅爲還滅門逆順觀之則悟
無生證辟支佛獨覺之果爲中乘之沘也此二乘沘
說二十季以根機鈍劣不堪受大故爲權耳從此二
十季後機漸通泰方說大乘菩薩所修六度之沘所
謂布施持戒忍辱精進禪定智慧此六乃大乘菩薩

所修名爲大乘。若修此六度，單爲下度衆生，上求佛果。此六度，法以般若爲主。故佛第二時說般若經。有二十二季，其經最多。來此方者，有八部般若，共六百卷。此經純談般若，真空智慧，破并二乘生死涅槃之有見。廣說六度，乃至四諦十二因緣等法，皆以般若真空爲極。則淘汰并執有之見，卽如金剛心經皆般若之宗極也。以并二乘所執之空，乃偏空，所謂斷滅之空。今此般若，乃實相真空。以佛說空假中三觀，乃成佛之妙門。惟此般若經一部，單說一空觀，故爲入大乘之初門。爲菩薩修行之妙法。梵語般若，此云智。

慧故菩薩利生以智慧爲首所謂無慧方便縛有慧
方便解狀此空觀一門雖載八部般若之中其實捷
要只在心經一十四行業已該盡心經一卷又單在
照見五蘊皆空一句已盡其義此一句之中若下手
做工夫又只在照之一字而已此最簡最要之泐門
狀禪門修行最初用心工夫只一照字卽此一字泐
門在吾佛直待三十季方說以此看來修心之泐豈
是尋常凡夫易說易行哉此一字泐門是謂教菩薩
乃大乘之泐也惟

佛出世本懷直是要令一切衆生成佛更無別事卽

四十九季所說一代時教今爲一大藏經總是學成佛之沕門成佛之方便雖有六度萬行種種多門正意只是三觀爲成佛之本三觀者乃空假中道三觀也一代教中總只說箇三觀若從肯來說到般若方纔說了空觀一門以此故知沕不易說亦不易入也狀般若會上其在會聞沕二乘之人皆以般若非已智分全不餐采況親受佛教三十季尚且不信不入如今惡業凡夫口口談空妄說空法無佛無祖無修無證便自稱爲上上根人豈非大妄誕人也惟佛已說般若真空觀狀後纔說假觀此一觀門所說之經

乃解溪密經所說唯識法門所謂迷如來藏名阿賴耶識依此賴耶具有三分變起根身器界一切山河大地衆生世界之假法乃唯識所變之影如鏡中像如水中月有而不實故名爲假問曰狀佛因何而說假觀耶答曰由并二乘之人執涅槃以爲實有是墮偏空故佛說般若真空以破執有之見故令觀般若實相真空又有一類樂空增勝菩薩執但空而不能涉有不肖度生故佛說一切衆生身心世界皆唯識變現全是假法以此唯識法門和會空有要顯卽空之有卽有之空直觀唯識以證真如此乃教并菩薩

出空入假度生之沘門也。故此一觀門在經有深密密嚴等經。當說此經時。在菩薩大根已能信受。其小根二乘畢竟不敢入俗利生。故佛說維摩一經。以淨名居士示現處俗有妻子眷屬。假託問疾。因緣與文殊對談不二沘門。以呵斥二乘激發入俗度生之心。其敎名爲彈偏斥小。歎大褒圓。爲小不恩議沘門。以祐二乘狹劣之見。此乃吾

佛深慈大悲。爲小根人種種方便權巧。引入大乘之意也。是知菩薩涉俗利生之事。誠非小根劣解之所能堪。已經四十餘季敎化之功。尚費如此方便神力。

如今現在五濁煩惱生死苦海之人口口談空談禪
說道動以向上一着爲己任蔑視正法不懼因果不
知揣己妄自狂誕之如此耶以觀吾

佛利生之方便權巧費了多少苦心不敢輕易說教
人成佛一字今人動說超佛越祖非妄而何可不懼
哉

唯吾

佛出世說法四十九年所集諸經有一大藏始終只
說了八箇字所謂三界唯心萬法唯識從初至此已
經四十年才說破萬法唯識一句之義狀猶未敢顯

示唯心之旨以唯心乃萬法之極則也從上已來諸大弟子已聞唯識法門故此以後乃說楞伽經顯示三界唯心法門直欲令人悟此一心以爲極則若攝毒二空假泯絕二諦總歸一心狀後圓滿一心融歸中道爲理究竟故楞伽經云寂滅者名爲一心一心者名如來藏謂識藏卽如來藏非空非有直指一心離名絕相泯絕聖凡不屬修證階筵頓觀藏性名爲自覺聖智境界直離一切攀緣安心但了妄想無性卽悟無生是爲頓教法門達磨祖師傳二祖可大師以此經爲心印故此經獨被上上根人其二乘絕分

祖師門下故初學叅禪要離心意識叅離妄想境界
求出凡聖路學是乃純以此經爲宗極也此教乃說
一心之極則已經四十餘季多方開示歷過多少泐
門今方說此經小根尚爾絕分而今之僧俗教眼未
明修行無路盲狀無知自己心中妄想攀緣全狀不
知起滅頭數日夜未嘗一念清涼卽以向上離心意
識一着以爲己任話頭亦未夢見便開大口說禪其
自欺之心何如哉可謂大無慚愧人也可不懼哉且
今不但俗人無知妄談卽吾泐門後學僧徒全未聞
佛教修心泐門全不知用心工夫但只妄想幾時全

無正見便稱悟道自以爲足此又誰之欺誰之誤耶
戒之戒之慎之慎之在

佛過此四十季後方示一心法門足見法不易說不
易修不易悟也

唯吾

佛世尊特爲一大事因緣故出現世間一大事者所
謂衆生佛之知見也以衆生本具佛之知見今迷之
而爲妄想生死之知見歷劫以來迷而不知譬如窮
子持珠作丐枉受辛勤故佛興同體大悲特特出世
而爲開示衆生本有佛之知見使其悟入猶如指示

窮子衣裏之珠令其自知得受用耳。狀佛知見者卽是楞伽所說一心名。自覺聖智是也。一向不敢頓說以觀衆生根鈍不堪受此法。故久默斯要不務速說。直至四十季後多方淘汰根機已熟且化緣將畢故說楞伽經示一心法門以爲顯理究竟。此後卽說法華經示諸法實相以顯事究竟。此佛說法之次第也。以理事究竟方盡一心之極則故諸二乘人到此始信佛心決定不疑亦悟各各自己本有佛性一向不。失譬如窮子久逃他國今始歸來見父亦信父家業原是已有心相體信堪紹家業故長者委付嘗謂此

沩粦一經如長者委付家業之囑書乃佛利生究竟之本懷故佛謂諸弟子一一授記將來必定成佛且云凡有聞沩者無一不成佛此一大事因緣已畢故爲終教過此不久卽入涅槃狀在沩粦一時已盡吾佛出世利生之本懷至於涅槃一經顯佛性義以收沩粦未盡之機以破前來弟子未盡之疑以佛說凡有聞沩者無一不成佛此恐弟子并聞闡提無信之人不許成佛於此生疑故此經說闡提亦有佛性故假廣額屠兒放下屠刀便作佛事此則的信凡有知者畢竟成佛決定無疑如此方盡如來出世一番化

利衆生之能事至此已畢故此卽入涅槃也如上所
說乃吾

佛出世一代始終化生之儀軌漸次修因之法門雖
觀衆生本有佛性各各具足無不願成佛者但以煩
惱障厚畢業根淺不堪頓示大法故將一乘法分別
說三此乃一乘三乘之所由設也故楞伽已并乃三
乘之權教楞伽法華乃一乘之實教故天台判爲開
權顯實之教是知四十季并所說皆爲權設故爲根
機不等故也

此上所說頓漸不一通爲教義狀楞伽頓示一心爲

如來清淨禪而教豈非禪宗也至若

世尊自云我四十九季未說一字末後拈筈示衆人
天百萬罔朕不知獨迦葉一人破顏微笑

世尊乃云吾有正法眼藏涅槃妙心用付於汝是爲
教外別傳之旨從此二傳阿難以至西天四七東土
二三逢磨鹵來目爲禪宗不立文字直指人心見性
成佛謂之單傳法門故自曹溪以下二派五宗傳燈
所載千七百人皆悟心大士凡有言句稱爲公案以
禪本離言但留此一言半句爲心印之證據如世公
庭之案牘非是要人以此爲實法口耳流布以當自

已之玄妙知見也。狀吾

佛業已說了一大藏教。至若一心法門。何所不具。而必以拈等爲心要者。以一心之旨。離言說相。離名字相。離心緣相。以從前聞者。雖悟本心。狀猶未能離相。故假末後拈等爲遣執言。說之習氣。乃治執名言之病。以此爲金篦耳。今人不知教禪一心之旨。乃吾佛化度衆生之方便。各人妄執一端。以爲必當。故執教者非禪。執禪者非教。狀執教非禪者。固已自誤。而執禪非教者。又誤之更甚也。以執禪者執愚。自是妄認已見。以爲自誤。非毀大乘了義爲文字。以致究竟。

無成更可憐者觀今末法之世講席已微無大師匠故伶俐少季無多聞慧至有志向上參禪又無決定久遠之志以無明眼知識但只循情欺誑以致誤墮者多此可大爲流涕者也且又有僧徒妄自以爲悟道者誑惑世俗愚夫貪求供養有歸依者卽開示參禪爲向上一着有信之者話頭未熟妄想縱橫熱沸便以印正以爲有悟入處以致誤墮邪見如此爲害更甚此尤不可不知懼而自省也愚見不是不要參禪但說參之不真又無久遠決定之志妄自爲悟誤人甚多愚意假若看教不能參禪與參禪之無決定

者總不若專心淨業且不空過一生也智者自能鑒之請各自息卒無自欺自誤爲望

竊觀宰官士大夫參禪了悟者從古不少歷歷傳燈所載非一人也今世宰官中有志外護泐門多以參禪爲向上者此不比尋常一槩固自有說蓋曾有泐門參禪之士未大悟徹卽發願護持佛泐者亦有諸祖有大願力度生及菩薩示現救世者亦有曾在僧中參究未透而以習業牽引故今出世者雖在俗諦塵勞之中而宿習一念般若種子允明透露不能自掩故發爲文章功名事業以爲外護泐門者種種方

優作用不同其行門亦非一種有專向上者有專功行者有建立

三寶證願護法者有單爲自己生死者有發而爲忠孝者種種所行皆菩薩道不可以僧中行門一槩視之狀在僧中不止禪教二宗亦有苦行頭陀者亦有專修淨業者亦有真實行門者亦有隨緣佛事助揚法門者亦有持誦書寫經典爲求行門者此皆在佛白毫光中種種因緣而求佛道者亦不可以一槩而取故宰官中凡有護法淡心者但取僧中一行爲得亦不必定要箇箇叅禪方爲正行耳狀叅禪雖妙

實非小根所能狀在

佛世人天百萬獨迦葉一人達磨西來只得二祖黃梅七百餘人唯六祖一人印心豈細事哉若在僧中但有一行可以爲法門正事可以教化衆生卽是菩薩故曰種種所行皆菩薩道苟一事可取則已超乘清飯常流空過時炎者萬萬矣所謂短中取長則無善人長中取短則無全人自古世出世間全人之難得也如上葛藤乃至

佛化生儀軌之次第在佛豈不要人頓悟自心當下成佛但衆生根鈍不得不施權接引耳古人云僧徒

不能了悟自心且於教法留心時尤亦不空過予則謂今之僧徒縱不能參禪看教有能持戒誦經作福護法者亦說勝尋常魔種萬萬矣在居士中但能持齋念佛助揚三寶者皆真實行矣是在諸佛之所望也願諸方高明達士當自信之慎無以愚言爲妄也
化儀之餘

示立章衆道人

老人於癸丑冬日自粵東杖策來南嶽道經立章善男子鄺紹楨等二十餘輩迎老人於經堂殷勤頂禮而作供養求請開示略說法要一宿而行既而老人

隱寓靈湖蘭若建諷誦

參嚴道場乙卯夏六月紹楨等遠來瞻禮正值老人
爲衆講說金剛般若隨喜聽聞大生歡喜拈香請示
在家修行捷要老人因示之曰安章當溪山僻地無
善知識經過在家善信雖多未聞正法今衆等各宜
精持五戒以爲正行此五戒者乃吾佛專爲在家
善男子說此五戒卽儒家五常仁義禮智信也故曰
五戒不持人天路絕是故在家善士應當奉持既持
五戒不可聽信邪師邪教妄說空撥無因果斷滅
佛種造地獄業只當專依佛教修圖方淨土法門

一味以念佛爲正行。狀淨土一門。接引衆生。利益最廣。古今念佛得往生者甚多。但以專精爲主。不是一月一兩會念佛幾千聲。如此便作正行也。第一要發心。深厭娑婆是苦。志求捨離。存想鹵方淨土。蓮華化生。念念定要往生。彼國親見彌陀。以爲本願。每日早晚要刻定功課。或持金剛經。或持彌陀經。或持往生咒。定要念佛。回向鹵方。發願往生。以此爲定規。二六時中。無論閒忙動靜。將一聲阿彌陀佛。持在口中。念念不忘。心心不斷。乃至睡夢之中。亦不忘失。如此打成一片。無有間斷。名爲一行三昧。此念純熟。一切

境緣不被打斷開眼合眼一聲阿彌陀佛明明現前將一切世間父母妻子種種恩愛妄想業念都被一聲佛號消磨清淨如此卽得自心清淨經云心淨則佛土淨如此念佛如此用心念到臨命終時單單只有一聲阿彌陀佛現前目奔一心不亂自狀得見阿彌陀佛親來接引一念之頃卽得往生淨土從此卽得永脫生死之苦高登極樂蓮萼化生便是一生念佛之效驗也如此精專若不往生則諸佛墮妄語矣若是悠悠歲月口說念佛心無實行是爲自瞞自欺豈有效驗之時耶善男子等旣發信心當行實行萬

勿自欺

涌泉寺湖心寺十二時念佛規制

佛說衆生生死長時以積日夜以至劫數輪轉不休
不息由念念妄想攀緣曾無一念之暫已者以妄想
不斷故生死無窮長劫迅輪無暫停寢職此之由也
佛說種種制心之法皆止輪之墊耳法門雖多以衆
生垢重識昏難以攝入故唯念佛一門最爲捷要所
謂憶佛念佛現前當來必定見佛以衆生一切妄見
皆屬生死獨許見佛之見爲出生死法狀見佛必從
憶念而至妄念日夜無間斷時特以念佛斷之此遠

公之匡山蓮社六時刻漏所由作也是時社中百二十人稱高賢十八而已斯則真實念佛者又不多得今之視念佛爲末品豈真知也哉近代唯牛山以念佛爲行且以煉魔爲名則苦於鉗錘太緊雖日夜不斷歲止三冬而人非一律亦難於長久頃雲棲力主念佛雖日以四時狀於夜有睡眠又費呼喚警醒泐欠微密今法師佛石玄津各發心以十二時爲請此泐固綿密而動靜飲食似難歸一若調理有度設泐得宜此又古今之良規也請益老人因爲勗立規制庶事不繁而人心一致此乃微密妙行也乃爲之制

條牒如左。凡念佛會建立。隨人隨願。廣狹不一。若力大則堂多。力微則堂一人。亦如之。但人不論多少。均派六班。晝夜班各二時。照香輪流出。班禮誦行道懺悔。而餘皆靜坐。隨聞默念。或習觀門。願者隨之。此則靜多動少。不繁不亂。而佛聲不斷。則妄想不生。如相呼相喚。不昏不敝。久則動靜一如。自他不二。寤寐恆常。此則不起於座。頓見彌陀。是爲第一如意妙行。至若飲食亦宜如法調之。務使內外一如。則人我兩忘。是非俱泯。而道場之安恬寂漠。亦無如此之妙者。老人漢恩。此法愧脚跟未搭。尚未遂心。故特示之。代爲

毒驅他日觀聽者衆必處處建立而淨土將徧震旦矣是有望焉

宗鏡堂結修證道場約語

佛說一大藏教備列衆行總歸修證以爲究竟所謂依一心以建立萬行以萬行還證一心故云無不從此法界流無不還歸此法界原夫法界不屬迷悟聖凡良由無明不覺迷此一心從迷積迷造種種業自取輪迴生死之苦所言修證者但以淨除自心之三障復還自心之本體故名爲證非離修外別有證也是以佛祖教人修行之說必先了悟一心淨除三障

以心難悟故設觀以通之障難除故設懺以淨之卽
毘嚴法界圓宗尊普賢爲毘盧長子而十種顯王以
懺悔業障爲弁列也是以從晉以來若天台親悟汾
粵三昧猶尊懺法爲妙行設有儀軌卽永明大師乃
淨土中人尚謹遵而力行之況其他乎嗟哉末法太
聖逾遠衆生垢重積迷逾深旣無了悟叅究之功又
乏懺摩悔臯之行將何法可望出生死乎惟永明大
師鎔一大藏歸唯心之旨著書百卷名曰宗鏡至今
臺存淨慈其書廣明一心如揭日月於中天朗萬法
之幽邃學者苟能親習則徹見自心不埃更悟證入

之要無出此矣大師生平自行日課誦念法華經一萬部兼天台法華懺儀依法修持率以爲常故現住世時則冥府帝君圖其像以瞻禮之以其行超生死實證唯心者乃其人也今也其書現行堂具存就能過而問焉者乎茲玄津壑法師乃其的嗣自幼出家於其寺薙髮之日卽問大師之名何如人遂發心願禮其塋是豈往會親近爲侍者乎大師塋已湮堂已圯公能力起而恢復之大師之肩先復放於山川草木之間者非無因也今諸緣小集公願暢明宗鏡之旨精懺悔修證之業將結真實法侶一十二人效圓

覺之軌則誓爲長期歲分四時每時撥二十一日爲
懺法導法等懺儀餘則日披宗鏡錄了悟唯心疑則
爲衆發明的旨不假枝葉但取直捷爲本叅冀其實
證其以入期之衆爲表率將引本山弟子爲禪維調
其羽翼雙舉飛騰法性空遠登覺天而朗慧日在斯
舉矣其結制規約因事施設務簡而易行真而無僞
以踐實地狀四事所需力不自持以安居不能效如
來逐日行乞之軌又不敢覬天人送供之儀而覈名
取實發心供給則有望於發心之檀越今有居士譚
孟恂力任先登則一切有緣靡不歡呼響應矣以諸

泐從緣生佛種從緣起是則今日之緣雖近而成佛之遠蹈實俗此爲最初之方便也諸人聞而歡喜遂破其端則究竟之果是在諸同緣同行同事同心一發勇猛之力耳若以世間生死之心而易出世之心以滋臯之財而養定慧之命諸有智者何慮而不爲耶苟生一念疑心則當面錯過百千萬劫矣

憨山老人夢遊集卷三十四上

侍者福善錄

門人通炯編輯

嶺南弟子劉起相重較

性相通說序

佛稱三界醫王所說一大藏經如世之醫方至於相宗文字如醫家之脉訣世之醫者捨脉而不知病症之微細則妄施方藥雖金丹適令人死故學佛而獨以參禪爲向上不究性相之原如醫不問病症而槩施以金丹未有不瞑眩發狂者此今禪門之大謬也若習教而不知參禪如說方而不識藥亦有知藥而不知病者參禪而不知教是猶重金丹而弃方脉莫

不夭折慧命器法身此可爲法門之大憂也鹵域佛
滅六百季中性相相攻破黜正法故馬鳴大士作起
信論以一之達磨東來禪教相非亦甚圭峰禪師一
之未能永明大師集一大藏爲宗鏡錄以會歸一心
爲二宗之極則學者槩束之高閣且相宗之不明也
久矣我明二百季來魯山法師始揭其規矩爲補註
萬曆中高原一雨諸公始倡唯識損莽王太史爲之
傳采證義其說益明狀特施於專門尚難入若夫修
禪之士猶憤憤也故執藥之病卒不可治予至徑山
澹居鎧公請益性相宗旨予略拈兩宗之要爲說以

通之以名相既有諸解精詳不俟一一特取其義而
變其文以歸一心爲極致可爲宗鏡之提綱直欲初
機易會此說一出而兩家牴牾可釋狀無疑修禪得
此可免誤服之虞而習教者亦無執方之誚此亦均
調之劑也智者觀之若飲倉公上池之水則洞見肺
肝特以胗脉爲名耳可不慢哉前以落筆艸藁付徑
山謄寫多譌佛殿山古愚拙公重梓以結法緣因爲
訂正傳之諸方當以此本爲正故序其始末以弁其
首

性相通說上

百法論義

佛說一大藏教只是說破三界唯心萬法唯識及佛滅後弘法菩薩解釋教義依唯心立性宗依唯識立相宗各豎門庭甚至分河飲水而性相二宗不能融通非今日矣唯馬鳴大師作起信論會相歸性以顯一心迷悟差別依一心法立二種門謂心真如門心生滅門良以未滅一心不屬迷悟體絕聖凡今有聖凡二路者是由一心真妄迷悟之分故以二門爲聖凡之本立真如門顯不迷之體立生滅門顯一心有隨緣染淨之用故知一切聖凡

修證迷悟因果皆生滅門收其末後拈華爲教外
別傳之旨乃直指一心本非迷悟不屬聖凡今達
磨所傳禪宗是也其教中修行原依一心開示其
所證入依生滅門悟至真如門以爲極則其唯識
所說十種真如正是對生滅所立之真如耳是知
相宗唯識定要會歸一心爲極此卽楞嚴所說一
路涅槃門乃二宗之究竟也學人不知其源至談
唯識一宗專在名相上作活計不知聖人密意要
人識破妄相以會歸一心耳故依生滅門中以不
生滅與生滅和合成阿賴耶識變起根身器界以

示迷悟之源了此歸源無二則妙悟一心如指諸掌矣

相宗百法者正的示萬法唯識之旨也以不生滅心與生滅和合成阿賴耶識以此識有覺不覺義其覺義者乃一心真如爲一切衆生正因佛性其不覺義者乃根本無明迷一心而成識體故此識有三分謂自證分見分相分又一師立四分增證自證分其證自證分卽不迷之真如其自證分乃真如一分迷中之佛性是爲本覺以衆生雖迷而本有佛性不失不壞以有真如自體可證故云自證

良由一心真如有大智慧光明義故今述而爲識
以湛寂之體忽生一念迷本圓明則將本有無相
真如之理體變起虛空四大之妄相名爲相分將
本有之智光轉爲能見之妄見是爲見分是知一
切衆生世界有相之萬法皆依八識見相二分之
所建立故云萬法唯識此實相宗之本源也今唯
識宗但言百法者始因彌勒菩薩修唯識觀見得
萬法廣博鈍根衆生難以修習故就萬法中最切
要者特出六百六十法造瑜伽師地論以發明之
可謂簡矣及至天親菩薩從兜率稟受彌勒相宗

法門又見其繁乃就六百六十法中提出綱要總成百法已盡大乘奧義故造論曰百法明門謂明此百法可入大乘之門矣故欲知唯識要先明此百法以此百法乃八識所變耳以一切衆生皆依此識而有生死三乘聖人皆依此識而有修證通名世出世法卽此百法收盡狀一切聖凡皆執爲我故論首標云

如世尊言一切法無我卽此一無字便見世尊出世說法四十九年單單只說破聖凡之我見耳我見旣離則八識無名而一心之義顯矣由是觀之何

相而不歸性耶今言百法名通有爲無爲世出世法其世間名有爲法有九十四出世間名無爲法有六種故一切兩字包括殆盡雖云出世猶未離我故總無之所以論主標一切法無我一句爲性相之宗本則了無剩法矣言百法者有爲法九十四種

第一心法有八第二心所有法有五十一第三色法有十一第四不相應行法有二十四第五無爲法有六

第一心法有八者謂眼識耳識鼻識舌識身識意識

第七末那識亦名意亦名染淨依俗呼傳送識第八阿賴耶識亦名無沒識又名含藏識此八識通名心王以第八識乃自證分爲生死主其前七識乃屬見分以爲心用故楞嚴云元以一精明分成六和合八識心王無善無惡不會造業其作善作惡者乃心所也故五十一心所又名心使如世人家之奴僕主人固善而奴僕作惡累及主耳起信論中不分心王心所但豎說三細六麤生起之相通名五意六種染心但云心念法異一語而已狀心卽八識心王念卽心所法卽善惡境界此唯識

相宗乃橫說八識王所業用故不同耳

第二心所有法五十一分爲六位一徧行五二別境
五三善十一四根本煩惱六五隨煩惱二十六不
定四

一徧行五者謂作意觸受想思乃善惡最初之動念
也雖有五法其實總成一念言徧行者謂四一切
心得行故以徧三性八識九地一切時是爲恆行
心所以第八識元一精明之體本無善惡二路其
前五識乃八識精明應五根照境之用同一現量
亦無善惡其六七二識正屬八識之見分其七乃

虛假故楞伽云七識不流轉非生死因其六識元屬智照今在迷中雖善分別況是待緣亦本無善惡若無徧行五法則一念不生智光圓滿現量昭狀卽此名爲大定六根任運無爲矣今言作意者乃八識田中含藏無量劫來善惡業習種子內熏鼓發不覺動念譬如潛淵湧鼓波而自踊是爲作意警心令起引心趨境不論善惡但只熏動起念處便是作意此生心動念之始也由衆生無始以來未嘗離念故今參禪看話頭堵截意識不行便是不容作意耳觸者令心心所觸境想受思等所

依蓋境有二其習氣內熏者乃無明因緣所變爲境若發出現行則是比似量所緣前塵影子爲境以觸能引心趨境境返觸心以有所取故名爲觸受者領納彼境爲欲所依此妄境一現則違順俱非境相含受不捨是名爲受想者境風飄鼓安立自境施設名言故名爲想思者於境取相微細不斷驅役自心令造善惡故名爲思其實五法圓滿方成善惡一念此最極微細故云流注生滅叅禪只要斷此一念若離此一念卽是真心故起信云離念境界唯證相應故

二別境五者謂欲解念定慧正是作善作惡之心也
前徧行五雖起一念善惡但念而未作若冒當下
止息則業行自消及至別境則不能止矣言別境
者謂別別緣境以四境別名爲別境也謂欲所樂
境解所沒定境念曾所習境定於所觀境慧則於
四境揀擇爲性故不同徧行此乃作業之心耳因
前徧行作後善惡此五體通麤細欲者樂欲謂於
所樂境希望欲作此正必作之心也解者勝解謂
於境印特決定知其可作不能已也念者明記謂
於可作境令心分明記取不忘也定者專一謂於

所觀境專注一心也慧者若作善名智慧若作惡名點慧謂於所作境揀擇可否了狀不疑也此五別別緣境而生若無此五縱有善惡之念亦不能作成事業而此五法不唯善惡卽出世修行亦須此五乃能成辦也上乃起業之心下乃造作之業其業不過善惡二途其善業止有十一其惡業則有根本煩惱六隨煩惱二十故世間衆生作善者少作惡者多也

三善十一者謂信精進慚愧無貪無瞋無癡輕安不放逸行捨及不害此十一法收盡一切善業信者

於實德能深忍樂欲世出世業以信爲本故首列
之精進者謂於善惡品修斷事中精進勇猛善行
方增此治懈怠之病世有淳善之人無精進力軟
煥因循故終身無成慚者謂自慚云我如此丈夫
之形又解教法故作惡耶有此慚心則惡行自止
愧者愧他謂恐人說呵故不親惡人不作惡事經
云有慚愧者可名爲人旣具信心加增慚愧則善
法自成矣貪瞋癡三者乃根本煩惱亦名三毒作
善之人此三不斷何以爲善故皆無之若無此三
毒是爲三善根輕安者謂離三毒麤重昏憒如釋

重負則身心輕快安隱堪任善行也不放逸者以縱貪瞋癡無精進心是爲放逸此不放逸乃三根精進四法上防修之功能也行捨者由精進力捨貪瞋癡則令心平等正直任運入道以念念捨處卽念念入處如人行路不捨前步則後步不進故名行捨以有此捨令心不沉掉故平等耳言行捨者乃行蘊中捨以行陰念念遷流爲三毒習氣熏發妄想不覺令心昏沉掉舉若無此捨不但昏掉將發現行若能念念捨之則昏掉兩捨自狀令心平等正直矣初用力捨各有功用若捨至一念不

生則任運無功自朕合道矣故予教人參禪做工夫但妄想起時莫與作對亦不可隨但撇去不顧自朕心安蓋撇卽捨耳不害者謂慈愍衆生不爲損惱此專治瞋不瞋則外不傷生內全慧命故爲至善如儒之仁而善法繫之終焉

四根本煩惱六者謂貪瞋癡慢疑不正見此六煩惱乃二種我法之根本爲二種生死之根本一切枝末從此而生佛說貪瞋癡名爲三毒傷害法身斷慧命者唯此爲甚慢乃我慢疑乃不信不正見卽邪見此三法障道之本慢障無我疑障正信不正

見障正知見二乘能斷三毒而不能斷此三法外
道之執邪見更甚所以修行難入正行者皆三煩
惱之過也法華名爲十使煩惱謂貪瞋癡慢疑爲
五鈍使不正見分五謂身見邊見邪見見取戒禁
取爲五利使由此煩惱能使衆生漂流苦海故名
爲使

五隨煩惱二十者謂忿恨惱覆誑諂驕害嫉慳此十
爲小隨無慚無愧此二爲中隨不信懈怠放逸昏
沉掉舉失正念不正知蔽亂此八爲大隨所言隨
者以隨他根本煩惱而生故言小中大者以隨有

三義謂自類俱起徧不善性徧諸染心具三名大
具二名中俱無名小以行相麤猛各自爲主故名
小隨以忿等十法各別而起故其無慚無愧則唯
自類俱起但徧不善性故名爲中其不信等八三
義皆備故名爲大蓋無慚愧及不信等與上善法
相反義相對照可知不必繁解要知請詳唯識
六不定四者一者睡眠二惡作三尋四伺論曰不定
謂悔眠尋伺二各二謂此二二各具善惡二法故
不定於一以不同前五位心所定徧八識三性一
切時一切地此心所之差別也今云惡作卽悔也

悔不定者如作惡之人改悔爲善悔前惡行如作惡之人悔前惡事不作故不定耳眠謂睡眠則令身不自在心極暗昧此非善惡故名不定卽眠中作夢亦不定善惡論說眠能障觀以眠爲心所者能令身心昏重之用但非一定善惡耳言尋伺者乃作善惡之心將作之時必返求於心意言籌量麤轉爲尋入細爲伺所謂麤細發言淺深推度名爲尋伺言不定者如讚佛菩薩初尋後伺方得妙辭如刀訟之人亦由尋入伺方得成算故此二法爲不定耳如上五十一法名心所者乃心家所有

之法也。凡八識心王不會造業，其造業者乃心所爲之。以此與心相應，故同時俱起。此心所法又名心數，亦名心迹，亦名心路。謂心所行處，總名妄想。又名客塵，又名染心，又名煩惱。有此心所擾亂，自心狀清淨心中，本無此事。如清冷水投以沙土，則土失留礙，水亡清潔。自心渾濁，名煩惱濁。今修行人專要斷此煩惱，方爲真修。楞嚴經云：如散濁水，沙土自沉，清水現前，名爲初伏客塵。煩惱去，泥純水，名爲永斷根本。無明故，修行人縱得禪定，未斷煩惱，但名清水現前，而沙土沉底攪之，又濁。況未

得禪定而便自爲悟道乎如阿難蒙佛開示如來藏性徹底分明而自述所悟但曰心迹圓明以向來都是妄想用事全不知不見今日乃見此是煩惱方得圓明了了耳今人以妄想爲悟心豈非自顛耶狀此心所名雖相宗要人識破此妄想相則容易妙悟本有真心矣豈直專數名相而已哉已上雖分王所總屬八識之見分

第三色法十一者謂眼耳鼻舌身五根色聲香味觸法六塵此五根乃八識攬地水火風四大所成內身爲識所依之根五塵亦是四大能所八法所造

爲所受用境其法塵乃外五塵落謝影子屬六識
所變一半屬心一半屬境此十一法通屬八識相
分境以唯識所見故問此五根身乃衆生之內身
言攬四大所成此義云何答楞嚴經云迷妄有虛
空依空立世界想澁成國土知覺乃衆生此言因
迷一心轉成阿賴耶識則靈明真空變爲頑空於
頑空中無明凝結成四大妄色故云依空立世界
乃妄想澁凝所成之國土耳由有四大妄色則本
有之智光轉爲妄見以彼妄色爲所見之境妄見
旣久則搏取四大少分爲我而妄見託彼四大以

爲我身故四大本是無知因妄見執受而有知真心無量今被無明封固潛入四大以爲心所謂色雜妄想相爲身故云知覺乃衆生是爲五蘊之衆生耳故內五根外六塵通屬八識之相分故叅禪必先內脫身心外遺世界者正要泯此相見二分單窺八識無明本體若身心世界不消總是生死之障礙耳所言分別我法二執者以執身爲我執六塵爲法執二乘修行但破身見則出分段生死其分別法執從八信心歷三賢位直至初地方破此執豈易易哉

第四不相應行法略有二十四種一得二命根三眾
同分四異生性五無想定六滅盡定七無想報八名
身九句身十文身十一生十二住十三老十四無常
十五流轉十六定異十七相應十八勢速十九次第
二十時二十一方二十二數二十三和合二十四不
和合

此二十四法言不相應者非能緣故不與心心所
相應又非質礙故不與色相應又有生滅故不與
無爲法相應爲揀四位故名不相應行法且又不
如色心心所有實體用亦非異色心心所等別有

作用故知卽是色心心所一分一位假立得等之名以不能造業故名不相應狀各有所攝如命根一法單屬心王乃第八種上連持色心功能異生性一法單屬心所乃二障種上令別功能二無心定及無想異熟乃第六識王所上假立王所滅已名無想等餘十九種通色及心與心所上假立此名衆同分乃根身世界五塵等爲色同分同依同緣爲心同分同起善惡爲所同分如勢速乃色心心所遷流不停定異乃色心善惡因果等決定不一此上諸法雖不造業乃唯識徧計故云分位差

別故名不相應行就中有相應一法乃是事法上
恰好之意非前心所故不相違其餘一一行相百
法具解茲不繁釋

此上九十四種名有爲法以是衆生生死之法乃
妄識所計有造作故故名有爲名世間法下六無
爲乃出世法

第五無爲法有六種者謂虛空無爲擇滅無爲非擇
滅無爲不動滅無爲想受滅無爲真如無爲此六
種法揀異有爲故立無爲名雖云出世法實通凡
小以不動乃四禪天人及三果那含想受滅乃滅

盡定耳言虛空無爲者從觀得名謂由修無我觀
所顯真理體若虛空離諸障礙故云虛空無爲擇
滅無爲者擇謂揀擇滅謂斷滅由無漏智斷諸障
染所顯真理故立斯名此在權教菩薩分斷分證
及二乘所證涅槃空法正屬擇滅故曰證滅高證
無爲實在二乘非擇滅者謂一切諸法本性清淨
不由擇力緣缺所顯卽實教菩薩以知實觀觀諸
法性本自寂滅以立此名不動滅無爲者謂第四
禪離前三定三災不至無喜樂等動搖身心得不
動名及五那含定想受滅無爲者無所有處想受

不行名想受滅無爲通滅盡定真如無爲者理非
倒妄不妄不變名爲真如以遠離依他徧計此正
唯識所證十種真如若依起信正是八識體中本
覺及真如門乃對生滅之真如未盡一心故是相
宗之極則此上百法乃總答何等一切法也下答
云何爲無我

言無我者略有二種一補特伽羅無我二法無我此
二無我直顯一心之源也蓋我法二執有麤有細
麤者名分別細者名俱生分別二執從初信心歷
過三賢至初地斷俱生二執從二地起至等覺後

心方纔斷盡斷此二執卽證一心是名爲佛今此
二無我則麤細二執皆在此中言補特伽羅云數
取趣謂諸有情數數起惑造業名爲能取當來五
趣名爲所取此蓋就凡夫所執分別五蘊假我及
外道所執之神我以取分段生死之苦者而言也
其實二乘所執蘊卽離我及涅槃我與地上菩薩
未破藏識七地已前俱未離俱生我執以取變易
生死之微苦者今論中但說凡夫分別之我未及
聖人蓋就相宗一往所談耳其實佛意以聖教量
盡皆破之方極大乘之義也法無我者謂我所執

之法也凡夫法執卽身心世界六塵依報外道所執妄想涅槃乃邪師邪教及邪分別爲分別法執二乘所執偏空涅槃菩薩所執取證真如論云現前立少物謂是唯識性以有所得故非實在唯識所謂存我覺我俱名障礙故八地菩薩已證平等真如尚起貪著是謂微細法執故未盡異熟尚屬因果直至金剛道後異熟空時卽入果海卽起信云菩薩地盡覺心初起心無初相遠離微細念故得見心性名究竟覺是則按此百法前九十四乃凡夫所執人法二我六種無爲乃二乘菩薩所執

人法二我以雖證真如猶屬迷悟對待總屬生滅
邊收故今生滅情忘聖凡不立方極一心之源故
皆無之此實卽相歸性之極則也嗟今學者但只
分別名相不達卽相卽性歸源之旨致使聖教不
明而有志叅禪者欲得正修行路可不敬哉

慇山老人夢遊集卷三十四

下

侍者福善目錄

門人通炯編輯

嶺南弟子劉起相重校

性相通說下

八識規矩

唐鑑

八識規矩者初玄奘法師糝成唯識論就窺基法師因見本論十卷文廣義幽乃請奘師集此要義將八識分爲四章每章作頌一十二句將五十一心所各派本識位下有多寡之不同條狀不紊故稱規矩狀論雖十卷其義盡此四十八句包括無遺可謂最簡最要爲一大藏教之關鑰不唯講者

不明難通教綱卽叅禪之士若不明此亦不知自
心起滅頭數所謂佛法之精髓也但窺基舊解以
論釋之學者難明故但執相不能會歸唯心之旨
予居雙徑適鎧公請益性相二宗之旨因先依起
信會通百法復據論義以此方文勢消歸於頌使
學者了朕易見而叅禪之士不假廣涉教義卽此
可以印心以證悟入之淺深至於日用見聞覺知
亦能洞察生滅心數但此頌近解已多皆得其宗
但就機宜或以此爲一助以隨文難明故先提大
綱於前使知綱要則於頌文不勞細解亦易會矣

大綱者謂一真法界圓明妙心本無一物了無身心世界又何有根境對待妄想緣影乎原此心境因無明不覺迷一心而爲識唯識變起見相二分故見爲心相爲境緣塵分別好醜取捨者皆妄識耳若了心境唯識則分別不生分別不生則一心圓明未離諸相矣今以未悟一心故須了唯識心境先知大綱方可安心入觀耳此頌大綱單舉八識心王緣境之時境有好醜故心所從之起憎愛取捨作善作惡善惡爲因故感苦樂二報則業力牽引受苦受樂衆生生死之法唯此而已此中開

列八識各具心所多寡之不同造業有強弱之不一分別皎然使學者了知起滅下落易於調治不致盲修瞎練不是徒知名相而已衆生日用見聞覺知不離心境其能緣之心具有三量量者量度揀非真智今妄識對境便有量度故心有三量謂現比非以第一念現前明了不起分別不帶名言無籌度心如鏡現像名爲現量若同時率爾意識隨見隨卽分別名爲比量比度不著名爲非量此三量乃能緣之心也而所緣之境亦有三謂性境帶質境獨影境現量緣性境性者實也謂根塵實

法本是真如妙性無美無惡以心無分別故境無
美惡是爲性境帶質境者比量所緣若比度不著
則爲非量其帶質境有真有似以六七二識各有
所緣故若六識外緣五塵比度長短方圓美惡等
相屬第二念意識分別故爲比量此長短等相是
帶彼外境本質而起名似帶質以是假故其意識
緣五塵過去落謝影子亦名有質獨影乃意識所
變故云以心緣色似帶質中間相分一頭生謂單
從能緣見分變起故若緣空等兔角等事名無質
獨影若散心所緣又有夢中境界及病中狂亂所

見皆是非量其定中觀魚米肉山等事皆現量明了意識雖通三量現多比非少也若七識緣八識見分爲我中間相分兩頭生以能所同一見分所變謂挾帶本質而緣故名真帶質境此心境之辯也以心境對待境有逆順好醜則能緣心依之而起憎愛取捨等見故起惑造業染成善惡二性所感將來受苦樂二報故心王有苦受樂受若不起善惡屬無記性則平平受因此受亦有三所以三界衆生上下升沉輪迴苦樂不忘者皆由唯識內習熏變發起心境故三量三境三性三受由是不

能出離生死皆心意識之過也故論云衆生依心意意識轉今唯識宗因凡夫日用不知苦樂誰作誰受外道妄立神我二乘心外取法故佛說萬法唯識使知唯識則知不出自心以心不見心無相可得故叅禪做工夫教人離心意識叅離妄想境界求正是要人直達自心本無此事耳今八識頌而稱規矩者只是發明心境其所作善作惡皆是心所助成以各具多寡之不一故力有強弱之不等耳此唯識之大綱也其心所法已見百法今預列心境則臨文不必繁解恐礙觀心耳叅禪若了

妄心妄境皆唯識所現則用功之時內外根境一齊放下不逐緣影能所兩忘絕無對待單提一念攝歸自心則一切境量分別皆剩法矣

五識頌

性境現量通三性眼耳身三二地居徧行別境善十
一中二大八貪瞋癡

此頌前五識首句言五識與八同體緣境之時單屬現量以前五識乃八識精明之體映在五根門頭了境之用以初映境時當第一念未起分別不帶名言無籌度心故名現量所緣境卽性境若起

第二念分別則是同時意識相應而起則屬比量
故前五識緣境單是性境現量言三性者乃善惡
無記三性由此五識體非恒審故三性皆通問五
識現量本無善惡何以通三性耶答此約同時意
識而引自類種子同時而起則三性皆通此指意
識任運而言非專五識也問若前五與八同體狀
八識畢竟無善無惡而五識何獨通耶答八識畢
竟不起分別五識則有任運分別約後分別位義
說通耳眼耳身三二地居者此言三界五識行止
之地也共有九地欲界五趣雜居地色界四地謂

初禪離生喜樂地二禪定生喜樂地三禪離喜妙
樂地四禪捨念清淨地無色界四空四地今言二
地者謂色界初禪離生喜樂地也以欲界五識全
具初禪天人以禪悅爲食不食段食故離舌識旣
不受食則亦不聞香故無鼻識但有眼耳身三識
而已居者止也謂此三識亦止於初禪若至二禪
定生喜樂地以入定中三識亦無故云居止於此
徧行二句頌相應心所也其相應心所通有五十
一而前五識但具三十四心所法餘不具者互相
違故

五識同依淨色根九緣七八好相鄰合三離二觀塵
世愚者難分識與根

此頌初句言五識所依之根次句言生識之緣三
句言了境之用言依根者謂八識精明之體今映
五根門頭各了自境不能圓通者以被五色根之
所籠罩故各別區分狀五根乃四大所造有浮塵
有勝義今淨色根乃清淨四大所造爲勝義根則
浮塵根不足依也且如盲者見暗與有眼處暗無
異足知根壞而見不壞則所依乃淨色根耳言淨
色者舊解但云四大初成之淨色此最難曉唯天

眼能見愚謂淨色卽無明殼也何以明之且妙明真心本來圓明廣大今變而爲識則被無明拘礙及識精映色結色成根而無明識體棲託其中是爲五蘊之衆生且此妙心非無明力雖能裹此而入軀殼之中耶故中陰身亦有形狀但輕薄耳鬼神五通乃淨色之用足可徵矣九緣等者言生識之緣謂八識生起共有九緣但具緣多寡之不同耳九緣者謂空明根境作意分別染淨種子根本此九通爲生識之緣以有爲之法非無緣而生偈曰眼識九緣生耳識惟從八鼻舌身三七後三五

三四謂眼識必仗九緣方生耳識八緣除明緣以暗中能聞故鼻舌身三識除明空二緣故惟七耳相鄰次第也應云八七後意識五緣者謂除分別與根以根乃七識染淨依故七識三緣者但有作意種子根本耳八識四緣者謂根卽末那境卽種子根身器界作意卽徧行一種子乃八識親生種子此通言生識之緣意取前五識因便及後三也鼻舌身乃合中取境以合方知故眼耳離根取境以合則壞根故此言了境之用也愚者難分一句言小乘人唯依六識三毒建立染淨根本不知八

識三分以根乃相分色法識乃見分心識以不知此只說根識相生縱許五識依五根生則六識依何爲根耶經云根能照境識能了別二乘不知故爲愚者此上八句頌有漏識下四句頌無漏成智變相觀空唯後得果中猶自不詮真圓明初發成無漏三類分身息苦輪

此頌轉識成智也變謂變帶相謂相分以五識一向緣五塵相分境以此識同八齊轉今托彼相變帶觀空而此方成智其相雖空亦未離空相以不能親緣真如無相理故智有根本後得根本智緣

如名真智後得智緣俗名爲假智果中不詮真者
正謂佛果位中尚名假智此破異師計也以安慧
師宗言後得因中緣如以五八果上轉故此破之
圓明初發謂八識轉大圓鏡智初發之時此前五
識卽成無漏以同體故所謂五八果上圓若此五
轉成所作智在佛果中則能現三類身謂大化小
化隨類化以此三身應機利物以在因中有外作
用故果上亦成利生大用也叅禪無明一破則五
根門頭皆光明智照如鏡照物不將不迎終日應
緣了無一法當情矣

六識頌

三性三量通三境三界輪時易可知相應心所五十
一善惡臨時別配之

此頌六識初句言六識善惡無記三性現比非三
量性境帶質獨影一一皆具以諸識中唯此具足
故其力最強三界生死善惡因果唯此識造故云
三界輪時易可知所以能取三界生死者以五十
一心所全具故業力殊勝但就善惡一念起時則
心所齊集以類相從故云分別配之則易可知也
狀意識有五種緣境不同五種謂明了意識散位

獨頭意識定中獨頭意識夢中獨頭意識散亂獨
頭意識此五種緣境唯後夢中散亂位二種單緣
獨影境其前三種皆能緣三境以凡有影像皆落
意識窠臼故叅禪工夫必欲離心意識者要不墮
光影門頭以非真實故耳

性界受三恒轉易根隨信等總相連動身發語獨爲
最引滿能招業力牽

此頌六識業力强勝也受雖云三其實有五謂苦
樂憂喜捨逼悅心曰憂喜逼悅身曰苦樂憂喜苦
樂不行時各爲捨受以此六識於三性三界五受

恒常轉變改易也正如善時忽生一惡念喜時忽生一憂念改易不定次句承之云若惡念起時則根本與隨煩惱連帶而起若善念起時信等善法亦相連而起以其善惡心所齊行故助其強勝耳於八識中能動身發語及造善惡之業獨此識最強引者能引諸識作業滿者能滿異熟果報故一業引一果多業能圓滿其所造業力招後報者則牽引入識受生死苦故八識頌云界地從他業力生者此耳故楞伽不立七識但言真識現識分別事識足知此識過患最重也

發起初心歡喜地俱生猶自現纏眠遠行地後純無漏觀察圓明照大千

此頌六識轉成妙觀察智也以此識順生死流具有分別俱生我法二執若逆流還源亦仗其作我法二空觀今轉識成智從觀行位入生空觀至七信位方破分別我執天台云同除四住此處爲齊從入信起作法空觀歷三賢位至初地初心方斷分別法執故云分別二障極喜無發起初心歡喜地名下品轉俱生二執方現故云現纏眠纏目現行眠目種子以俱生我法二執乃七識所執者七

識無力斷惑亦仗六識入勝生空觀初則有相觀
多無相觀少至第七遠行地六識恒在雙空觀乃
破俱生我執俱生法執未伏不起名中品轉至等
覺位上品轉時二障種現永斷此六識方得純淨
無漏相應心所亦同轉成妙觀察智也若此識所
智則日用現前六根門頭放光動地一切云爲皆
大機大用矣

七識頌

帶質有覆通情本隨緣執我量爲非八大徧行別境
慧貪癡我見慢相隨

此頌七識境量心所也此識唯緣帶質境以心緣
心名真帶質言通情本者以揀六識緣外境爲似
帶質也以此七識緣內見分爲我中間相分乃體
相之相以七識與八識見分本質交帶挾起故名
爲真三性之中唯有覆無記謂此識雖無善惡而
有四惑我見相應而起蓋覆真性故名有覆無記
隨緣執我量爲非此句揀量也若言帶質境則屬
比量今執內見分爲我以非我計我恒謬執故故
名非量此識唯具十八心所以雖無善惡而爲染
污意故具八大徧行并別境中慧慧卽我見之體

貪癡見慢同一我見故餘不具者以善是淨法此
識染污小隨麤猛此識微細由見審淩疑無容起
愛着我故瞋不得生故唯四惑狀無別境四者以
欲希望此識任運無所希望故無欲解者印持未
定境此識恒緣定事故無勝解念乃記憶曾所習
事此識恒緣現所受境無所記憶無不定四者悔
者悔先所作此識恒緣現境故無惡作睡眠必依
身心重昧外衆緣力此識一類內執不假外緣故
無睡眠尋伺二法麤細發言淺深推度此識唯依
內門而轉一類執我故皆無之

恒審思量我相隨有情日夜鎮昏迷四惑八大相應
起六轉呼爲染淨依

此頌七識力用也此識恒常思察量度第八見分
爲我故云恒審思量我相隨恒之與審八識中四
句分別第八恒而非審不執我無間斷故第六審
而非恒以執我有間斷故前五非恒非審不執我
有間斷故唯第七識亦恒亦審以執我無間斷故
有情由此生死長夜而不自覺者以與四惑八大
相應起故第六依此爲染淨者由此識念念執我
故令六識念念成染此識念念恒思無我令六識

念念成淨故六識以此爲染淨依是爲意識之根
以此識乃生死根本故參禪做工夫先要志斷四
惑內離我見方有少分相應

極喜初心平等性無功用行我恒摧如來現起他受
用十地菩薩所被機

此頌七識轉成平等性智也分別俱生我法二執
乃六七識各有所執分別二執從初發心六識修
生空觀至七信位斷分別我執隨入法空觀歷三
賢位至初地方斷分別法執此則七識應轉平等
性智因有俱生二執未淨故此識未得純淨無漏

故曰極喜初心平等性無功用行我恒摧謂六識
恒住雙空觀中至第七遠行地名無功用行方捨
藏識俱生我執永斷法執間起故云我恒摧若此
七識轉成無漏平等性智在佛果位中現千丈他
受用身爲地上菩薩說法故云十地菩薩所被機
行人此識一轉則不動智念念現前法界圓明湛
然常住矣

八識頌

性唯無覆五徧行界地隨他業力生二乘不了因迷
執由此能興論主諍

此頌八識行相也此識唯一精明本無善惡故四性中唯無覆無記諸心所中唯與徧行五法相應以有微細流注生滅故三界九地乃生死六道此識爲總報王當體雖無善惡而被他六識業力牽引而生前六識頌引滿能招業力牽者此也以此識深細世尊尋常不說故云陀那微細識習氣成瀑流真非真恐逃我常不開演向爲二乘但說六識建立染淨根本二乘一向未聞故不了耳又云阿陀那識甚微細一切種子成瀑流我於凡愚不開演恐彼分別執爲我故云因逃執以小乘不知

故不信有此識是故大乘論師引大小乘三經四
頌五教十理證有此識故云由此能興論王諍十
證之義論中廣明

浩浩三藏不可窮淵深七浪境爲風受熏持種根身
器去後來先作主公

此頌八識體相力用也浩浩者廣大無涯之類謂
藏識性海不思議熏變而爲業海故此識體廣大
無涯以具三藏義故名爲藏識三藏者能藏所藏
我愛執藏以前七識無量劫來善惡種子唯此識
能藏前七識所作異熟果報唯八識是所藏之處

由第七識執此爲我故云我愛執藏論云諸法於
識藏識於諸法爾更互爲果性亦常爲因性積劫
因果不失不壞故云不可窮本是湛淵之心爲境
風鼓動故起七識波浪造種種業經云藏識海常
任境界風所動洪波鼓冥壑無有斷絕時故云淵
深七浪境爲風前七現行返熏此識以其體有堅
任可熏性故云受熏前七善惡種子唯此識能持
又能持根身器界一期令不散壞者以是此相分
乃所緣之境故以爲三界總報主故死時去後投
胎先來爲衆生之命根故云作主公其實不知不

死不生法身常住也故經云識藏如來藏所謂如
來藏轉三十二相入一切衆生身中故如來藏有
恒沙稱性淨妙功德今迷而爲藏識亦具恒沙染
緣力用能一念轉變則妙性功德本自圓成以真
妄覲體故頌歎其力用廣大也

不動地前纔捨藏金剛道後異熟空大圓無垢同時
發普照十方塵刹中

此頌轉成大圓鏡智也謂此識因七識執爲我故
從無始時來相續長劫沉淪生死漸教菩薩從初
發心修行漸斷習氣歷過三賢登地以去至第七

地破俱生我執此識方得捨藏識名顯過最重故云不動地前纔捨藏以微細法執及有漏善種間起尚引後果名異熟識至金剛心後證解脫道異熟方空故云爾也異熟若空則超因果方纔轉成大圓鏡智言無垢同時發者以佛果位中名無垢識乃清淨真如謂鏡智相應法身顯現圓明普照十方塵刹故結云普照十方塵刹中以理智一如方證究竟一心之體此唯識之極則乃如來之極果也諦觀此識深潛難破若此識絲毫未透終在生死岸頭古德諸祖未有不破此識而有超佛越

祖之談者今人生滅未忘心地雜染種子未淨纖毫便稱悟道豈非未得謂得未證謂證可不懼哉此論古存一解今解甚多但委細分別名相轉見難入而修行未親教者望崖而退卽久依講席罷學參禪者亦未知此心地生滅頭數此論雖云相宗但顯唯心之相若不知此亦難究心不免得少爲足故予此解未盡依論唯取其義而變其語使學者一覽便見正要因此悟心不是專爲分別名相也若責予荒邈之罪固不敢辭而爲修行者未必無功幸高明達士得意遺言是所望也

六祖大師識智頌解

大圓鏡智性清淨

教中說轉識成智祖師說識本是智更不須轉但
悟八識自性清淨當體便是大圓鏡智矣

平等性智心無病

此言七識染污無知乃心之病也若無染污之病
則平等性智念念現前

妙觀察智見非功

言六識本是妙觀察智於應境之時若以功自居
則執我見此則爲識若不居功則日用應緣純一

妙觀察智矣

成所作智同圓鏡

言前五識轉成所作智此亦不必轉但悟八識清淨圓明則於五根門頭放光動地一切作爲皆鏡智之用矣

五八六七果因轉但轉名言無實性

此言轉識分位雖說六七二識是因中轉五八二識乃果上轉其實轉無所轉但轉其名不轉其體故云但轉名言無實性

若於轉處不留情繁興永處那伽定

此結前轉而不轉之義也所言轉識成智者無別
妙術但於日用念念流轉處若留情念繫著卽智
成識若念念轉處心無繫著不結情根卽識成智
則一切時中常居那伽大定矣豈是翻轉之轉耶
六祖此偈發揮識智之妙如傾甘露於焦渴喉中
若能深觀有何相宗不是向上一路耶予昔居五
臺夢升兜率親見彌勒爲說唯識曰分別是識不
分別是智依識染依智淨染有生死淨無諸佛子
因悟唯識之旨此雖夢語不可向夢人說也

憨山老人夢遊集卷三十四

下之終